

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoman loh theih lohna avangin, phur vak lovin Mizoramah Human Rights Commission an din a ti.
- 2. National Sports Day pualin Mizoram hmun hrang hrangah hun hman chhonzawm zel a ni.
- 3. Prime Minister Narendra Modia chuan ni 4 thanga Uzbekistan leh Kyrgyz Republic tlawh turin vawiin khan a zinchhuak.
- 4. Nepal tuilian avanga thi zat chu 626 an tling tawh a. Mi 2000 chuang chin hriatlohin an la bo.

<><><>

CM

Chief Minister Pu Lalduhoman loh theih lohna avangin, phur vak lovin Mizoramah Human Rights Commission an din a ti.

Assembly Fur thutkhawm neih zawh taka Opposition Leader Pu Lalchhandama Ralte zawh belhna leh chanchinbu pakhat a Human Rights Commission a sawi dan sawifiah tura a ngenna a chhana-ah House Leader Pu Lalduhoma chuan Human Rights Commission hian thatna lai leh that lohna lai a nei thei a ni a ti a, Mimal right humhimna tur a nihna kawngah a tha em em a, chutih rual chuan Mizo te zingah leh India rama hnam dangte zingah pawh an khawtlang then faina kawnga mipui te leh an NGO ten hna an lo thawhna daltu a ni thei deuh dawna an hriat thin avangin India ramah hian phur takin an din lem lo hlawm a ni a ti a, Mizoramah ngei pawh sorkar hmasa te hunah din tura tih daih tawh a ni a. Anni pawh khan din mai kha an phur lem lo a nih hmel a, central lam atangin nawrna a rawn na tual tual a, din lo theilo dinhmuna an awm avanga din an ni a ti.

An hlauhthawn zingah Mizote customary law a awm a, lal leh upain an kaihhruai lai atanga vawiin thlengin mahni khawtlanga NGO te leh khawtlang hruiute te an awm a, khawtlang hruiute chu Human Rights Commission-ah thiamloh chang thei niin pawikhawih tute tan diklo taka hman theih a ni a, khawtlang then fai duh na kawngah a chet theih loh mai a hlauhthawnawm a, chuvangin din tur pawhin an phur lem lo a ti.

Tunah hian loh theih lohna avanga din a ni a, dik tak hman a nih theih te pawh an beisei tih Chief Minister chuan a sawi a ni.

<><><>

ICT-SMART CLASSROOM

Samagra Shiksha - ICT Scheme hnuaia Project Approval Board kaltlangin Mizorama sorkar sikul 242-ah smart classroom neih mek a ni a; smart classroom hi Aizawl district-ah 60 awmin a tam ber a, kum hian smart classroom 4 siam belh a ni tawh.

Assembly Session neih zawh tâka Education minister Dr Vanlalhlana’n ZPM member Pu H. Ginzalala zawhna ziaka a chhan danin, kum 2018 leh 2019 atanga waviin thlengin Samagra Shiksha hnuaia Information and Communication Technology (ICT) in Schools scheme kaltlangin Mizorama sorkar secondary school leh senior secondary school 242-ah smart classroom hi neih a nih mek thu a tarlang.

Dr Vanlalhlana chuan, Project Approval Board 2025-26 chuan smart classroom hi sikul 4 atan a pawm a, hemi atan hian smart board pakhat zel inkaihhruaina anga pek an nih thu tarlangin, tunlai thiamna hmanga zirtirna inpek hi an hlawkpui viau nia hriat a ni, a ti a; zirtirtuten tunlai thiamna sang Artificial Intelligence (AI) an hmelhriat theih nan AI zirna bul tanna tur video clip buatsaih tura hmalak mek a nih thu a tarlang bawk.

Education Minister tarlan danin, smart classroom 242 zinga 60 hi Aizawl district ami niin a tam ber a, smart classroom 31 awmna Lunglei district-in a dawt a; Khawzawl district-ah smart classroom 9 awmin a tlem ber a ni.

<><><>

SUPPLY MINISTER - RETAILER

Food Civil Supplies & Consumer Affairs Minister Pu B. Lalchhanzova chuan retailer-te chu dinhmun zahawmah awm se, buhfai bûk dik lo pe chhuaktu tia hriat ni lo se an duh thu a sawi a; retailer-te lawmman tihpun a nih dawn thu a sawi.

Akashvani News Aizawl zawhna chhangin Pu B Lalchhanzova chuan, buhfai bûk dik turin sorkar chuan theihtawp a chhuah thu a sawi a; retailer-te hi hrem tumin an veh ngai lo a, an tihdik loh pawhin an tih dik loh dan a nasat leh nasat loh te, engtiang chiahin nge mipui an lungawi loh tihte chu DCSO leh an thawhpuiten District level-ah uluk takin an zirchiang thin tih a sawi.

((BYTE - Pu B. Lalchhanzova))

Retailer-te chu dinhmun zahawmah awm se, buhfai buk dik lo pe chhuaktu tia hriat ni lo se a duh thu sawiin Pu B Lalchhanzova chuan, social service tha tak petu tia hriat an nih theih nan theihtawp an chhuah tih a sawi a; tunah hian retailer lawmman chu Card var leh Card senah kg 1-ah cheng 1 leh duli a ni a, hei hi cheng 2-ah a chho dawn a, Card eng leh pawla kg 1-a cheng 2 leh pawisa 85 an hlawh thin chu Rs. 3 an hlawh tawh dawn, a ti bawk.

<><><>

NATIONAL SPORTS DAY

National Sports Day pualin Mizoram hmun hrang hrangah hun hman chhunzawm zel a ni a, vawiin khan Saitual DC Office leh Saitual District Badminton Association buatsaihin National Sports Day 2026 hman a ni.

He National Sports Day pual hian One Day Badminton Tournament Category 3, Mens Doubles (Open), Womens Doubles (Open) leh Mens Doubles (Mixed) in elna buatsaih niin zing dar 10 atanga khan inelna hi khelh tan a ni a, hun bul tannaah thutiam sawirualna hun hman a ni a, he inelna hi zan lama zawh tura ruahman a ni.

National Sports Day hi Hockey khel thiam, India infiammi ropui Major Dhyand Chand-a piancham August ni 29-ah kum 2012 atang khan kum tin hman thin a ni a, Infiamna chu nitin nunah taksa vawngthatu leh rilru hrisel siamtu, mihring inpumkhatna siamthatu a nih avangin India khua leh tui zawng zawng ten taksa sawizawi uar lehzual tura inzirtirna atan hman a nih bakah infiamite hmasawn zel tura infuihthar nan hman thin a ni.

Vawiin vek khan Hnahthial DC Office leh Govt Higher Secondary School bultumin 'National Sports Day, 2026' chu vawiin khan District Volleyball Court-ah hman a ni a, he hun hi District Sports & Youth Officer leh Sub Deputy Commissioner (SDC) ni bawk, Pu Lawrence Lalhlanthara chuan a hmanpui. Zirlai mipa leh hmeichhia tan Table Tennis, Volleyball leh insuknawrah te inelna awmin hmeichhia tan bik hian inkawibah hmangin inelna a awm a ni.



BJP

Mizoram BJP president Dr K Beichhua chuan thuchhuah siamin, Chief Minister Pu Lalduhoma’n tunlai hian Mizoram history leh constitution kalhin thu a sawi fo tih a tarlang a; 6th Schedule Area inrelbawlna chungchanga tih àwm loh lutuka statement a siam chu paw i a tih thu a sawi.

Dr K Beichhua chuan, tunlai hian Chief Minister Pu Lalduhoma chuan Mizoram history leh constitution kalhin thusawi a nei ta zeuh zeuh tih a tarlang a, state khat CM meuhin ram history chungchang leh India dan ina Mizo hnam humhim nana provision a pekte thubelhchian dawl tâwklo hmanga statement a siam mai thin hi a zialo takzet a ni, a ti.

Mizoram chuan Chief Minister a nei nual tawh a, hetiang thil chungchangah hian ram Pa ber an nihna angin puitling takin dan leh social contract ina a phal piah lampangah an inrawlh ngailo tih tarlangin Dr K Beichhua chuan, CM kalta te an lo puitling in, an fakawm hle, a ti.

Dr K Beichhua chuan, Pu Lalduhoma hian Opposition Leader ni loin, state khat CM ani tawh tih inhre nawn se, Mizoram history leh inrelbawl dan chungchangah puitling lo tak taka thu a chhakchhuah hian nakinah Zofate tan paw i a thlen thei ani tih hi hre nawn turin kan chah duh a ni, a ti bawk.



MPCC

MPCC Vice President Pu Zodintluanga Chief Minister Pu Lalduhoma'n Assembly House Session neih zawh takah MNF te debate neihpuiah sawm chu tul lo tak ni a a hriat thu sawiin Pu Lalduhoma chu amah leh amah a inhnial tawk viau a ni a ti.

Vawiina Sihphir Group Congress Committee te Political Training a neihpui naah he thu hi sawiin Pu Zodintluanga chuan Chief Minister chu amah leh amah a inhnial nasa hle tih sawiin thil tha zawng zawng an tiam a. CM chu Car man to ah a chuang ve dawn lo, Car pakhat bak a kawl dawn lo, Restricted Tender an ti tawp ang tih leh thil tam takah an intiam a. Nimahsela, an sorkar a, an intiamna tihhlawhtlin an la nei lo am mipui an bum nasa a, amah leh amah a in hnial nasa hle a ti.

MPCC Vice President chuan zankhat thil thua politics a danglam thei tih sawiin, chu chu India ramah pawh a chiang a ni a ti a, tunah hian Mizoramah pawh an thawh vang ni miah loin mipui rilruah Congress Party sorkar tir duhna a lian sawt hle tih sawiin a hunlai zelin Congress Party hi Zoram mipuite mamawh thlentuh leh hmasawnna thlentuh an ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

RESTRICTED TENDER - BLANKET APPROVAL

ZPM sorkar kal mekah Chief Minister Pu Lalduhoma chuan restricted tender hmanga hna thawh tur 117 atan blanket approval a pe tawh a; heng project 117 hi cheng vbc 957 point 17 man a ni.

Assembly Session neih zawh takah Chief Minister Pu Lalduhoma chuan MNF member Pu Robert Romawia Royte zawhna ziaka chhangin, sorkar kallai mek chhunga Chief Minister in Restricted Tender tura Blanket Approval a pek projects zat chu 117 a ni a, sum zat chu cheng vbc 957 point 17 a ni, a ti.

Chief Minister hian restricted tender hmanga hnathawh tur atan blanket approval hi vawi 2 a pe a; April ni 17, 2025 leh October ni 22, 2025 khan a pe chhuak a; SASCI hnuaia restricted tender hmanga hnathawh tur atan vek blanket approval hi pek chhuah a ni.

<><><>

PM

Prime Minister Narendra Modia chuan ni 4 thanga Uzbekistan leh Kyrgyz Republic tlawh turin vawiin khan a zinchhuak.

Tun tum hi Uzbekistan bik a tlawh tum li na tur a ni a. Prime Minister office thuchhuah danin ni hnih a cham chhungin Pu Modia hian Uzbekistan President Mirziyoyev nen ram pahnih inlaichinna chungchang an sawidun dawn a ni. India hi Uzbekistan-in sumdawnna

lama a thawhpui langsar 10 zingah a tel a. Ram pahnih sumdawnna hlut zawng hi dollar tluklehdingawn khat a tling tawh a ni.

Uzbekistan a tlawh zawh hian PM Modia chian Kyrgyz ah hian SCO Summit vawi 26 na a hmang leh dawn a ni.

<><><>

NEPAL

Nepal tuilian avanga thi zat chu 626 an tling tawh a. Mi 2000 chuang chin hriatlohin an la bo. Chhanchhuah hna ngawrh taka thawh mek a ni a. Police te sawidanin Chitwan ah ruang 233 hmuh tawh a ni a. Nawalparasi East ah ruang 158, Gorkha-ah 48, Nawalparasi West-ah 47, Dhading-ah 45, Nuwakot ah 41, Tanahun ah 31 leh Rasuwa ah ruang 13 hmuh tawh a ni.

Hetihlai hian External Affairs Ministry chuan India mi 320 chu biak pawh theihlohin an la tih a puang a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 137-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>